

**Uunga siunnersuut: Aatsitassanut tunngasunik suliaqarneq pillugu Inatsisartut inatsisaat**

*Aatsitassanut Inatsisillu Atuutsinnejernerannut Naalakkersuisumit saqqummiunnejartoq*

**pillugu****Inuussutissarsiornermut Aatsitassanullu Ataatsimiititaliap****siunnersuutip aappassaaneerneqarneranut****ISUMALIUTISSIISUTAA**

Ataatsimiititaliap [kingullermik] suliarinninnermini ilaasortarai:

Inatsisartunut ilaasortaq Mariane Paviaisen, Inuit Ataqatigiit, siulittaasoq

Inatsisartunut ilaasortaq Aqqalu Jerimiassen, Atassut, siulittaasup tullia

Inatsisartunut ilaasortaq Lars Poulsen, Siumut

Inatsisartunut ilaasortaq Adam Kristensen, Inuit Ataqatigiit

Inatsisartunut ilaasortaq Hans Aronen, Inuit Ataqatigiit

Inatsisartunut ilaasortaq Dines Mikaelson, Siumut

Inatsisartunut ilaasortaq Pele Broberg, Naleraq

UPA2023-mi 20. aprili siullermeerinninnerup kingorna siunnersuut ataatsimiititaliamit misissorneqarpoq.

**1. Siunnersuutip tunuliaqutaa, siunertaa imarisaalu**

Siunnersuuteqartup isumaa naapertorlugu aatsitassanut ikummatisanullu inatsit pissutsinut assiginngisitaartunut tunngasoq innuttaasunut suliffeqarfinnullu paassiuminaassinjaavoq. Taamaattumillu pissutsit aatsitassanut ikummatisanut inatsit ullumikkut maleruagassiunneqartut siunissami inatsisini assiginngitsuni pingasuni maleruagassiunniisaat siunnersuutigineqarpoq. Nalinginnaasumik aatsitassarsiornermik ingerlatsinermi pissutsit pillugit inatsit immikkoortoq. Annikitsumik aatsitassarsiornissamut akuersissutit aamma najukkani sanaartornernut attaveqaasersuutinullu suliassanut aatsitassanik piiaaneq pillugit annikitsumik aatsitassarsiornermut inatsit immikkoortoq. Taanna 2023-mi ukiakkut ataatsimiinermi saqqummiunnejartussatut pilersaarutigineqarpoq. Maannakkut aatsitassanut ikummatisanullu inatsit atuuttoq ikummatisiassanut aamma nunap iluata toqqorsinermut atorneqartarneranut atuutiinnassaaq.

Tamanna tunngavigalugu Aatsitassanut tunngasunik suliaqarneq pillugu Inatsisartut inatsisissaattut siunnersuut una ima aalajangersaasoq Naalakkersuisunit saqqummiunneqarpoq:

- ”Aatsitassarsiorluni ingerlataqarnerit” paasineqassapput tassaasut, ingerlatassat Inatsisartut inatsisaanni pineqartunut ilaasut.
- Aatsitassat paasineqassapput tassaasut aatsitassanit atortussiassat allat, ikummatissiassanit (uulia aamma naturgassi) allaanerusut, tamarmik.
- Ikummatissiassat paasineqassaaq tassaasut ikummatissiassat sananeqaataat aalajangersimaqqissaartoq .

Inatsisartut inatsisissaattut siunnersuut una ingerlatassanut makkununnga atuuppoq:

- 1) Misissueqqaarneq, aatsitassarsiorluni misissuineq, aatsitassanik piiaaneq aamma aatsitassanik ilisimatuussutsikkut misissuinerit kiisalu ingerlatassat tamatumunnga atasut.
- 2) Ingerlatassanut Inatsisartut inatsisaanni pineqartunut ilaasunut nukissiornermut attuumassuteqartunut kiisalu ingerlatassat tamatumunnga atasut.
- 3) Aatsitassarsiorluni ingerlataqarnerit pillugit nunap iluata toqqorsivittut aamma siunertanut allanut atorneqarnera kiisalu ingerlatassat tamatumunnga atasut.
- 4) Misissuinerit aammalu allatigut ingerlatat, ingerlatanut nr. 1-3-mi taaneqartunut pingaaruteqartut

Inatsisartut inatsisissaattut siunnersuut una ingerlatassanut makkununnga atuutinngilaq:

- 1) Najukkami aatsitassarsiorluni ingerlatat.
- 2) Ingerlatat ikummatissiassanut tunngasut.
- 3) Nunap iluata toqqorsinermut allanullu siunertanut, aatsitassarsiorluni ingerlatanut imaluunniit ingerlatanut tamatumunnga atasunut tunngassuteqanngitsunut, atorneqarnera.

Siunnersuut imarisai erseqqinnerusut siunnersummut nalinginnaasumik nassuaatini kapitali 2-mi Siunnersummi immikkoortut pingarnerit ataanni nassuaatigineqarput, taakkulu innersuussutigineqarput.

## **2. Inatsisartuni siunnersummik siullermeerinninneq**

Siunnersuut siullermeerneqarmat inatsisissatut siunnersuut imartoqisumik oqallisigineqarpoq, tamatumani qulequttat Kalaallit Nunaanni aatsitassarsiornermut tunngasut assigiinngitsorpassuit oqallisigineqarlutik. Kalaallit Nunaanni aatsitassanut suliffissuaqarnermik ingerlatsinermi mianerisassat suut salliutinnejartariaqarnerannik apeqqut immikkut qitiutillugu sammineqarpoq, tamannalu inatsisissatut siunnersuutip matumani pineqartup annertoorujussuuneranik ersersitsivoq. Inatsisissatut siunnersummik piareersaalluni sulinerup ingerlasimanera aamma oqallisigineqarpoq. Aatsitassanut ikummatissanullu inatsisip allangortinneqarnissaanik pisariaqartitsineq aammalu inatsisip paasiuminarnerunissaa siunertaralugu inatsisip pingasunut aggulunneqarnissaa nalinginnaasumik tapersersorneqarpoq. Partiit arlallit kiisalu Naalakkersuisut erseqqissarpaat, aatsitassanut ikummatissanullu

inatsisip matuma siunissami ukiorpassuarni atuussinnaanissa pingaaruteqartoq. Taamaattumillu anguniakkanut taakkununnga ikorfartuutaasumik inatsimmik suliaqartoqarsinnaaqquullugu aatsitas-sarsiornermik ingerlatsinermi isiginiagassat suut salliuutinneqartariaqarnersut paasinarsisinneqarnissaa pisariaqartinneqartoq tamanit isumaqataaffigineqarpoq. Tamanna tunngavigalugu inatsi-sissatut siunnersuut aappassaaneerinninnissaq sioqqullugu Inuussutissarsiornermut Aatsitassanullu Ataatsimiititaliamit suliarineqartussanngorlugu innersunneqarpoq, tamatumani oqaatigineqarluni ataatsimiititaliami suliarinninnermi piffissaq pisariaqartinneqartoq atorneqartariaqartoq.

### **3. Tusarniaanermi akissutit**

Nalinginnaasumik nassuaatini immikkoortutut kingullertut oqartussaasut, kattuffiit il. il. Siunner-suimmik tusarniaavagineqarsimasut nalunaarsorneqarsimapput. Kiisalu siunnersuut piffissami 23. novembari 2022-mit 22. decembari 2022 tikillugu tusarniaassutigineqarsimasoq paassisutissiisutigineqarpoq. Namminersorlutik Oqartussat tusarniaavianni [www.naalakkersuisut.gl](http://www.naalakkersuisut.gl) -imi tusarniaanermut atortut tamanut saqqummiunneqarput. Tusarniaanermut akissutit isumaliutissiissummi matumani ilangussaq A-tut ilangunneqarput. Tusarniaanermut akissutini tiguneqartuni immikkoortut pingarnerit tusarniaaneq pillugu allakkiami Naalakkersuisunit issuaavagineqarsimasut tusarniaaneq pillugu allakkiami allassimasoq ataatsimiititaliamit maluginiarneqarpoq. Taamatut periuseqarneq akornutissaqanngilaq, tassani tusarniaanermut akissutit unneqqarissumik allaaseri-neqarsimappata.

#### Tusarniaanermi atortunut ataatsimiititaliap oqaaseqaatai allat:

Atortussat annertoorujussuunerat pisariusorujussuunerallu eqqarsaatigalugu tusarniaanermut piffis-saliunneqartoq sivikitsuararsuunerarlugu Sulisitsisut tikkuaanerat ataatsimiititaliamit aallarniuti-galugu oqaatigineqassaaq, tamannalu Aatsitassanut Inatsisillu Atuutsinnejarnerannut Naalakkersuisoqarfimmit oqaaseqarfingineqarsimanngilaq.

Inatsisisatut siunnersuummi matumani aalajangersakkat ataasiakkaat nutaajunersut ingerlateq-qitaanersulluunniit inatsimmut nassuaatini allaqqanngitsoq Sulisitsisut aammalu Nunatsinni Advokatit erseqqissaatigisimavaat. Taamaallunilu inatsimmut atuuttumut sanilliullugu inatsiseqar-nikkut inissisimanermi allannguutit aalajangersimasut paassiuminaassisut Sulisitsisut Nunatsinnilu Advokatit isumaqarput, taamaattumillu tusarniaanermut akissummik suliaqarnissaq pisariune-rulersimalluni. Tamanna aamma Aatsitassanut Inatsisillu Atuutsinnejarnerannut Naalakkersuiso-qarfimmit oqaaseqarfingineqarsimanngilaq.

Siunnersuutip § 1 imm. 2-a innersuussutigalugu avatangiisirut, sulinermi avatangiisirut kiisalu inuiaqatigiinni pissutsinut tunngatillugu nunani tamalaani periuserineqartoq "The Equator Principles" "OECDs common approaches" aamma "The IFC Performance Standards" <sup>1</sup>-imi allaaserineqartoq

---

<sup>1</sup> [https://naalakkersuisut.gl/-/media/horinger/2022/11/2311\\_mineralaktiviteter/svar/dundas-titanium.pdf](https://naalakkersuisut.gl/-/media/horinger/2022/11/2311_mineralaktiviteter/svar/dundas-titanium.pdf)

Naalakkersuisunit inatsisisatut siunnersuummi matumani eqquutsinnejassasoq Dundas Titaniumip tusarniaanermut akissutaani kaammattutigineqartoq ataatsimiititaliamit maluginiarneqarpoq. Kaammattuut taanna tusarniaaneq pillugu allakkiami Naalakkersuisut ima allatut oqaasertaleraat ataatsimiititaliamit maluginiarneqarpoq: *"Kalaallit Nunaanni maannakkut maleduagassat nunani tamalaani malitassanik naammassinninersut nalilersuisoqassasoq, Dundas Titanium A/S-ip siunnersuummi § 1, imm. 2 innersuussutigalugu kaammattuutigaa."*.

Naalakkersuisut issuaanerat Dundas Titaniumip kaammattuutanut naapertuutinngitsoq ataatsimiititaliamit oqaatigineqassaaq, erseqqissumimmi uku taaneqarmata: *"The Equator Principles"* *"OECDs common approaches"* aamma *"The IFC Performance Standards"*.

Tassunga Naalakkersuisut ima akipput: *"Siunnersuut manna ilaatiqut, inatsisit maannakkut atuuttut nunani tamalaani malitassanik qanoq annertutigisumik naammassinninersut nalilersuinernik allamit ingerlannejartunik tunngaveqarpoq"*.

Nunani tamalaani malitassat aalajangersimasut suut siunnersuummi matumani tunngaviunersut Naalakkersuisunit itisilerneqanngitsoq ataatsimiititaliamit oqaatigineqassaaq.

Transparency International Greenlandip siunnersuut ataatsimut isigalugu akuersaartumik oqaaseqarfigaat, kaammattutigaluguli Extractive Industries Transparency Initiativesimit (EITI) kaammattuutit malinneqassasut aammalu kaammattutigalugu Kalaallit Nunaat EITImut piaernerpaamik ilaasortanngussasoq.

*Kalaallit Nunaanni inatsisit suleriaatsillu EITI-p tunngavigisaannut annertuumik naapertuupput, aammalu Kalaallit Nunaanni aatsitassarsiornermiq suliaqartuni peqquserluttoqarnissaa aarlerinaateqarsinnaasoq takussutissaqanngilaq. EITI-mut ilaasortaanissaq ingerlaavartumik isumaliutesuutigineqartarpoq, maannakkorpiaq kalaallit Nunaat danskit naalagaaffiat peqatigalugu kattufimmi malinnaasutut inissismavoq. Taamaattoq allaffissornikkut annertoorujussuarmik suliaqarnissap EITI-mut ilaasortaanermut tunngassuteqartup naapertuilluartuutissinnaanissaanut, Kalaallit Nunaanni aatsitassarsiorluni ingerlataqartut ikippallaartut, maannakkorpiaq naliliisoqarpoq.*

Ataatsimiititaliamit maluginiarneqarpoq Kalaallit Nunaanni aatsitassanik suliffissuaqarnermi peqquserluttoqarnissaanut aarlerinartoqanngitsoq Naalakkersuisut paassisutissiissutigigaat oqaatigalugulu Kalaallit Nunaanni aatsitassarsiornermi ingerlatat amerlanngitsut. Ataatsimiititaliap paasinninnera malillugu, nunani tamalaani aatsitassarsiornermi suliffissuaqarnerup ilisarnaatigigaa peqquserluttoqarnissaata annertuumik aarlerinartoqarnera. Aatsitassarsiornermiq ingerlatsinerup iluani peqquserluttoqarsinnaaneranik aarlerinartoqarnerata nunatsinnit siorngerlugu iliuuseqarfingeqartariaqartoq ataatsimiititaliaq isumaqarpoq. Aarlerinartoq taanna sermersuup aakkiartornera malillugu nunatsinni aatsitassat nunarsuatsinnit soqtigineqaleraluttuinnarnerannut kiisalu aatsitassanik pinngitsoorneqarsinnaanngitsunik qularnaatsumik ataavartumillu pilersuisinnaanerup qulakeerneqarnissaanik kissaateqarneq pissutigalugu taakku piumaneqarnerannut ataqtigiissillugu isigineqassaaq. Tassunga atatillugu aatsitassat qaqtigoortut aatsitassatut pinngitsoorneqarsinnaanngitsutut taaneqarput.

Ilisimatitsiffiusumik ataatsimiinnermut atatillugu Naalakkersuisunut apeqquteqarnermut atatillugu pissutsit tusarniaanermi taaneqartut itisilerneqarnissaat ataatsimiitaliamit qinnutigineqarsimavoq.

#### **4. Sassartitat**

Sulisitsisut Aatsitassarsiornermi Inuussutissarsiutinut Ataatsimiitaliaannit aallartitat ataatsimiitaliamut sassartinneqarnissamik qinnuteqaataat ataatsimiitaliamit tiguneqarpoq. Siunnersuutip ilaani §18, 32, 35, 45, 52, 53, 68 kiisalu 140-mut tunngasut Kalaallit Nunaanni aatsitassanut suliffissuarnermut pitsaanngitsumik sunniuteqarnissaat immikkut ernummatigalugu aallartitat oqaatigaat. Taamaattumillu allannguutissanut kissaatiminnik saqqummiussippu. Qularnaatsunik patajaatsunillu atugassanut sinaakkuteqarnissaq aatsitassanut suliffissuaqarnermi nalinginnaasumik pisariaqartinneqartoq siunnersuullu matumani pineqartoq tamatumunnga ilaatigut akerliusutut isigneqarsinnaasoq aallartitat oqaatigaat. Sassartitsinermit atortut **ilanngussaq B-tut ilanngunneqarput**.

#### **5. Aatsitassanut Inatsisillu Atuutsinneqarnerannut Naalakkersuisumik ilisimatitsiffiusumik ataatsimeeqateqarneq**

Siunnersummik suliarinninnernni atugassatut ulloq 4. maaji 2023 ilisimatitsiffiusumik ataatsimiinnermi apeqqutit arlallit akissuteqarfingeqqullugit ataatsimiitaliap Aatsitassanut Inatsisillu Atuutsinneqarnerannut Naalakkersuisoq qinnuigaa. Inatsisisatut siunnersuutip matuma annertunerusumik ilisimasaqarfigineqarnissaanik ataatsimiitaliap kissaateqarnera tunngavigalugu apeqquteqartoqarpoq. Kiisalu siullermeerinninnerni oqallinneq kiisalu oqartussanik, kattuffinnik il. il. tusarniaanermut akissutit tunngavigalugit apeqquteqartoqarpoq. Ataatsimiitaliap apeqqutaasa Naalakkersuisullu akissutaata assilineri isumaliutissiisummut matumunnga ilanngussaq C-tut ilanngunneqarput.

Tamatuma saniatigut Aatsitassanut Inatsisinillu Atuutsitsinermut Naalakkersuisoq ataatsimiitaliamit ataasinngornermi ulloq 15. maaji 2023 ilisimatitsiffiusumik ataatsimeeqatigineqarpoq, tamatumani inatsisisatut siunnersummi § 128-mi aalajangersakkat Naalakkersuisunit itisilerneqarnissaat ataatsimiitaliamit kissatigineqarluni. Ataatsimiitaliap apeqqutaasa Naalakkersuisullu akissutaasa assilineqarnerat isumaliutissiisummi matumani ilanngussaq F-itut ilanngunneqarput.

#### **6. Apeqqutit.**

Siullermeerinninnerni oqallinneq aammalu Naalakkersuisumik ilisimatitsiffiusumik ataatsimeeqatiginninneq kiisalu Sulisitsisut Aatsitassarsiornermi Inuussutissarsiutinut Ataatsimiitaliaannik sassartitsineq tunngavigalugit ataatsimiitaliaq Naalakkersuisunut apeqqutinik arlalinnik nassisivoq. Ataatsimiitaliaq Naalakkersuisut sukkasuumik akissuteqarnerannut qujavoq. Ataatsimiitaliap apeqqutai Naalakkersuisullu akissutaat ilanngussaq D-tut takuneqarsinnaapput.

#### **7. Ataatsimiitaliap siunnersummik suliarinninnera**

Ataatsimiititaliap aallarniutigalugu oqaatigissavaa inatsisissatut siunnersuut una siullermeerinninnermi sorpassuit tikillugit oqallisigineqarmat. Taamaattumillu inatsisissatut siunnersuut una pillugu isumakuluutit assigiinngitsut oqaatigineqarnerat ataatsimiititaliamit maluginiarneqarpoq. Kiisalu aatsitassanut inatsit siunissami ukiorpassuarni atuussinnaasariaqarnerata pingaaruteqassusia tamanit isumaqatigineqarpoq, taamaattumillu inatsimmi taamatullu aqtsinermi sangujoraarnissaq pinngitoortinneqartariaqarluni. Taamatuttaaq inatsisissatut siunnersummikul suliaqarnermi inatsimmik piareersaanerup ingerlasimanera oqaluuserineqarpoq. Atortussat pisariusupilussuit amerlasuut pineqartut ataatsimiititaliamit maluginiarneqarpoq, tamannalu siullermeerinninnermi kiisalu tusarniaanermut akissutini aamma oqaatigineqarpoq.

Siullermeerinninneq tusarniaanermullu akissutit tiguneqartut tunngavigalugit ilisimatitsiffiusumik ataatsimiinnissamik Aatsitassanut Inatsisinillu Atuutsitsinermut Naalakkersuisoq ataatsimiititaliamit qinnuigineqarpoq. Inatsisissatut siunnersuutip annertoorujussuup suliarineqarnerani atugassamisut inatsisitigut inisisimamanerup allannguutaannut taaneqartunut skemanngorlugu takussutissiamik ataatsimiititaliap Aatsitassanut Inatsisinillu Atuutsitsinermut Naalakkersuisoq qinnuigaa. Apeqqutit nassiunneqartut Naalakkersuisut akissutaat ilanngussaq C-mi takuneqarsinnaapput. Siunnersuutip annertunera eqqarsaatigalugu inatsimmut atuuttumut sanilliullugu allannguutissatut siunnersuutinut inatsisissatut siunnersummi matumani siunnersuutigineqartunut takussutissiaq taanna ataatsimiititaliamit amigaatigineqarsimavoq. Kiisalu skemanngorlugu takussutissiaq taamaattoq aqqutigalugu siunnersuut paasiuminarnerulersinneqassaaq. Takussutissiaq ilanngussaq C-mi takuneqarsinnaavoq. Inatsisissatut siunnersuut matumani pineqartoq nunap inoqqaaviisa pisinnaatitaaffiisa qulakkeerneqarnissaat ataqqillugu suliarineqassasoq isumaqatigiissutigineqartoq ataatsimiititaliamit maluginiarneqarpoq. Ingerlatat inatsimmut ilaasut innuttaasut peqqissusiannut akornutaassanngitsut inatsisissatut siunnersuutip § 1 imm. 2-ani qulakkeerneqassasoq kissaatitut saqqummiunneqartoq ataatsimiititaliamit aamma maluginiarneqarpoq. Minnerpaamik ullunik 21-nik tusarniaanermut piffissaliinermut taarsiullugu annerpaaffissamik aalajangersaasoqarnissaa nalinginnaasumik isumaqatigiissutigineqartoq ataatsimiititaliamit maluginiarneqarpoq. Inatsimmut atuuttumut sanilliullugu innuttaasut peqataatinneqarnerunissaat aatsitassanullu suliffissuaqarnerup pitsaanerusumik atugassaqartinnejarnissaa inatsisissatut siunnersuutikkut matumuunakkut qanoq qulakkeerneqartutut Naalakkersuisunit isigineqarnersoq Naalakkersuisunit ilaatigut itisilerneqassasoq ataatsimiititaliamit kissaatigineqarpoq. Taamatuttaaq inatsisissatut siunnersuutip matuma suliarineqarneranik ingerlatsinerup kiisalu aatsitassanut suliassaqarfimmi peqquserlulluni iluanaarniartarnerup pinaveersaartinnissa siunertalarugu pineqatissiissutit suut inatsisissatut siunnersummikul matuminnga suliarinninnermi Naalakkersuisunit ilanngunneqarnerat itisilerneqassasoq ataatsimiititaliamit kissaatigineqarpoq.

Apeqqutit nassiunneqartut Naalakkersuisunit itisiliinerusumik Naalakkersuisunit akineqarnissaat ataatsimiititaliamit amigaatigineqarmat ataatsimiititaliamit oqaatigineqassaaq.

Oqaatigineqartutut Sulisitsisut Aatsitassarsiornermi Inuussutissarsiuutinut Ataatsimiititaliaannik ataatsimiititaliaq sassartsivoq. Qularnaatsunik patajaatsunillu atugassanut sinaakkuteqarnissaq aatsitassanut suliffissuaqarnermi nalinginnaasumik pisariaqartinneqartoq siunnersuullu matumani pineqartoq tamatumunnga ilaatigut akerliusutut isigineqarsinnaasoq aallartitat paassisutissiistigigaat ataatsimiititaliap maluginiarpa. Minnerpaamik ullunik 21-nik tusarniaanermut piffissaliineq aatsitassarsiornermi suliffissuaqarnermi nalorninermik pilersitsisoq ataatsimiititaliamit immikkut maluginiarneqarpoq, tassunga taarsiullugu kissaatigineqarsimavoq ulla tusarniaaffiusut amerlanerpaamik qassiusinnaanerat killilerneqassasoq.

Inatsisissatut siunnersuummi § 53, aatsitassanik piliarneqartunik suliarinnittarnermut tunngasoq, Kalaallit Nunaanni aatsitassarsiornermi suliffissuaqarnerup ineriarneranut siuarsaataanngitsoq aallartitanit paassisutissiissutigineqartoq ataatsimiititaliamit maluginiarneqarpoq. Aallartitat paasisutissiissutigaat tamatumunnga pissutaasoq Kalaallit Nunaata nunarsuatsinni unammillersinnaas-suseqalernissaanut marloquiasamik akileraannginnissaq pillugu Kalaallit Nunaata nunanut allanut arlalinnut isumaqtigiiissuteqarnissaata amigaataanera. § 68-p nassatarigaa suliaqarfinnut allanut sanilliullutik aatsitassarsiornermk ingerlatsisut akileraarutinik nalunaarutiginnittarnermut annertunerusumik allaffissortut aallartitamit paassisutissiissutigineqartoq ataatsimiititaliamit aamma maluginiarneqarpoq. Taamaattumillu tamatuma allanngortinneqarnissaa aallartitamit kissaatigineqarpoq. Aallartitanit isumakuluutigineqartut ataatsimiititaliamit maluginiarneqarput. Sassartitsineq, siullermeerinninneq ilisimatitsiffiusumillu ataatsimiinnerit tunngavigalugit apeqqutinik arlalinnik Naalakkersuisunut nassiussinissaq ataatsimiititaliamit aalajangerneqarpoq. Ilanngussaq D ataatsimiititaliamit innersuussutigineqarpoq. Aalajangersakkanut tunngaviit immikkoortumi “sassartitat”-ni Naalakkersuisunit nassuiarneqartut ataatsimiititaliamit maluginiarneqarpoq. Taa-maattorli § 68 aamma § 58-imut tunngaviit Naalakkersuisunit itisilerlugit nassuaatigineqarnissaat ataatsimiititaliamit kissaatigineqarsimavoq. Aalajangersakkanut siuliani taaneqartunut tunngaviusnik Naalakkersuisut paasisitsinerat ataatsimiititaliamit maluginiarneqarpoq. Ataatsimiititaliaq Naalakkersuisut sukkasumik akissuteqarnerannut qujavoq.

Tamatuma kingorna eqqisisimatisinermut tunngasoq § 128 pillugu ilisimatinneqarumalluni Aatsitassanut Inatsisinillu Atuutsitsinermut Naalakkersuisumik ataatsimiititaliaq ilisimatitsiffiusumik ataatsimeeqateqarpoq.

## **8. Siunnersuutip pisortanut aningaasaqarnikkut allaffissornikkullu kingunerisassai**

Siunnersuutip piviusunngortinneqarneratigut aningaasaqarnikkut allaffissornikkullu kingunerisassat siunnersuummut nalinginnaasumik nassuaatit ataanni allaaserineqarput. Kingunerisassat taakku pillugit Naalakkersuisut nassuaataat Inuussutissarsiornermut Aatsitassanullu Ataatsimiititaliamit tuaatissatut tiguneqarput, taakkulu allanik oqaaseqaatissaqarfigineqanngillat.

## **9. Ataatsimiititaliap inassuteqaatai:**

Ataatsimiititaliami **amerlanerussuteqartut** Inuit Ataqatigiit Siumullu ilaasortaatitaat siunnersuut pillugu ima oqaaseqaateqarumapput:

Inuit Ataqatigiit §1.imm.2-mi inuit peqqissusaat innarlerneqassanngitsoq pingaaruteqartillugu inatsimmi allanneqartariaqartoq, taamaammallu siunnersuummi tamanna allanngortinneqartariaqartoq isumaqarput, tamannalu ataatsimiititaliami ajorineqanngilaq.

Tamanna tunngavigalugu siunnersuutip pingajussaaneerneqarnissaanut allannguutissatut siunnersummik saqqummiusseqqullugit Naalakkersuisut ataatsimiititaliami ilaasortanit Inuit Ataqatigiit ilaasortaatitaannit kaammattorneqarput, taamaaliornikkut siunnersuummi § 1, stk. 2-mi aalajangersagaq oqaaseqatigiinnik imaattunik taarserneqassalluni:

*“§1.Imm. 2. Ingerlatat inatsimmi pineqartunut ilaatinneqartut inuit peqqissusaat innarlerneqassanngitsoq isumannaallisaanermut, avatangiisinut, isumalluutinik atuinermut aamma inuiaqatigiinni piujuartitsinissamut tunngatillugu isumannaatsumik, ilanngullugit innuttaasut inooqatigiinnermut, kulturimut, upperisatigut anersaakkullu naleqartitaat ileqquilu, kiisalu pissutsini taamaaqataanni nunani tamalaani suleriaatsinut pitsaanerpaanut akuerisaasunut naapertuutumik ingerlanneqartarnissaat, Inatsisartut inatsisaanni tunngavissaatinneqarpoq.”*

Oqaatigineqartutut Aatsitassanut Inatsisillu Atuutsinneqarnerannut Naalakkersuisoq ataatsimiititaliamit marloriarlugu ataatsimeeqatigineqarpoq. Inatsisissatut siunnersuummi § 128-mi aalajangersakkamut allannguutissatut siunnersummik Naalakkersuisut saqqummiussinissaannik kaammattuummik ataatsimiititaliap isumaliutissiissutaani ilanngussinissaq Naalakkersuisup kingullermik ataasinngornermi ulloq 15. maj 2023-mi ataatsimeeqatiginerata kingorna ataatsimiititaliamit aalajangiunneqarpoq.

Nalinginnaasumik soqtigisanik mianerinninnissaq isumaginiarlugu eqqissisimatitsinissamik aammalu ingerlatassanik inerteqquteqarnissaq killilersuinissarlu pillugit Naalakkersuisut aalajangersakkanik Inatsisartut avaqqullugit aalajangersaasinnanissaat Siumumit kissaatigineqanngilaq. Tamanna tunngavigalugu siunnersuutip pingajussaaneerneqarnissaanut allannguutissatut siunnersummik saqqummiusseqqullugit Naalakkersuisut ataatsimiititaliami ilaasortanit Siumup ilaasortaatitaannit kaammattorneqarput, taamaaliornikkut siunnersuummi § 128-mi aalajangersagaq oqaaseqatigiinnik imaattunik taarserneqassalluni:

*§ 128. Nunap sannaanut tunngasut taakkualu piujuartinnissaasa mianerinissaannik isumaginninnissamut sumiiffik ataaseq arlallilluunniit aalajangersimasut eqqissisimatinneqarnissaat pillugu aalajangersakkanik Inatsisartut inatsisikkut aalajangersaasinnaaapput. Ingerlatassaq ataaseq arlallilluunniit suliareqquaasoq pillugu eqqissisimatitsinermut inatsimmi aalajangersakkanik Inatsisartut aalajangersaasimanngippata, Inatsisartut inatsisaat una malillugu sumiiffimmi nunap sannaatigut eqqissisimatitami ingerlatassanik sunilluunniit suliaqartoqqaqusaamngilaq.*

*Imm. 2. Nalinginnaasumik soqtigisanik mianerinninnissaq isumaginiarlugu Inatsisartut inatsisaat una malillugu sumiiffimmi ataatsimi arlalinniluunniit ingerlatsinissaq Inatsisartut inatsisikkut inerteqqutigisinnavaat killilersorsinnaalluguluunniit.*

Tamanna tunngavigalugu siunnersuut ataatsimiitaliami Inuit Ataqatigiit ilaasortaatitaasa taamatullu Siumup ilaasortaatitaasa kaammattuutaat siuliani allassimasut naapertorlugit Naalakkersuisut allannguutissatut siunnersuummik saqqummiussereerneranni ilusimisut iluseqartoq **akuerineqas-sasoq** ataatsimiitaliami **amerlanerussuteqartut** Inuit Ataqatigiit Siumullu ilaasortaatitaasa inassutigaat.

Ataatsimiitaliami **ikinnerussuteqartut** Naleqqap Atassutillu ilaasortaatitaat siunnersuut pillugu ima oqaaseqarumapput:

*“Inuussutissarsiornermut Aatsitassanullu Ataatsimiitsitaliami ataatsimiinnermi ulloq 15/05-23 partiit illuatungiliuttuusut marluusut immikkoortut, tassalu Atassut aamma Naleraq suliamti nalorninarluinnartumik inissinneq pillugu akuersaarsinnaanermut nangaassuteqarput.*

*Naalakkersuisut suliassaannut Inatsisartut akuutinniarneqarnerat eqaallisaarinanilu ersarlulersitsissaaq, inatsisisssallu siunertaanut uniuutilersinnaanera aarleqqutaalluni.*

*Inatsisisssamut siunnersuut pingajussaaneertinnagu amerlanerussutillit kissaataat, isikkus-samisut ilusissani tiguppagu, aarleqqutigaarpununatsinni aatsitassarsioqatigiiffiit nunatsinni aatsitassarsiornissaannut kajumissaarneqannginnissaat.*

*Allannguutissatut siunnersuutaasut Naalakkersuisumut kissaatigineqartut allakkatigut takunagit, suna siunertaanersoq qanorlu aatsitassarsioqatigiiffiinnut sunniuteqassanersoq nalileruminaappoq.”*

Ataatsimiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappassaaniigassanngortippaa.

---

Mariane Paviaisen  
Siulittaasoq

---

Aqqalu Jerimiassen  
Siulittaasup tullia

---

Hans Aronsen

---

Adam Kristensen

---

Lars Poulsen

---

Dines Mikaelsen

---

Pele Broberg